



La Bikeria è uss a Rabius

Il mecanist da velos Gabriel Candinas ha dislocà ed engrondì sia fatschenta.

3



Semperverd, ina istorgia da fantasy

Simona Demarmels preschenta proximamain il cudesch ch'ella ha scrit ensemen cun Anna Negrini.

9

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

Referat davart la musica populara

■ (anr/bcs) D'incuort ha gnü lö il la sala polivalenta da la Chasa Puntota ün referat da *Jachen Erni* davart l'istorgia da la musica populara. A man da documainta e fotografias ha el dat üna survista dal temp dal 1800 fin dal 1950 da la musica populara in Engiadina/Val Müstair. Erni ha eir orientà davart instrumaints e litteratura da quella musica. Ils Randulins chi abitaivan impustüt in Italia e tuornaivan d'instà a Sent per far lur vacanzas han influenzà la musica populara ferm. Sco cha'l poet Schimun Caratsch manzuna in üna da sias poesias as vaiva qualvoutas l'impreschiun dad esser d'instà sù Sent, causa las melodias influenzadas da la musica taliana, in üna cità da la Toscana.

> PAGINA 7

Pro Tarasp resta activa

■ (anr/bcs) D'incuort sun gnüts infuormats ils cummembers da la Pro Tarasp davart las activitats da l'on cumbinada cun üna prevista da quai chi dess capitar. La Pro Tarasp es gnüda clomada in vita avant s-chars duos ons ed ha sco böt da promover la convivenza e la colliaziun tanter indigens e giasts. Ella sviluppa e realisescha novas ideas a favur d'ün cumün vivaint. La società vain presidiada da *Regula Mosca*. Quist on sun gnüts sports divers arrandschamaints e l'infuormaziun ha muossà chi sun diversas occurrenzas chi seguan.

> PAGINA 7

Teater a Sedrun

■ (anr/sr) Cullas seras liungas d'atun arriva tradizionalmein il temps per visitar las presentaziuns dallas gruppas da teater ella regiun. Aschia era a Sedrun nua che la Cumpignia da teater Rueras envida venderdis, igl 1. da november alla premiera dalla cumedia «Ina memoria sc'in tgaz furau». Grazia als acturs «originals» e versai che seprentan silla tribuna – sut la reschia da *Hubert Venzin* – vegn ei strusch ad esser pusseivel da bandunar la casa da scola a Sedrun senza haver giu risadas. La cumedia en treis acts raquenta la historia d'in president communal ch'ha piars la memoria ed ils scumbegls ed avantatgs ch'ei cumbinai cun sia amnesia a cuorta vesta.

> PAGINA 5

Servetsch d'abunents e da distribuziun: tel. 0844 226 226 mail: abo@somedia.ch



Nov tschientaner – nova strategia

La Lia Rumantscha ha envidà a la radunanza da delegads giubilara

DA SUSI ROTHMUND / ANR

■ Sin il di exact 100 onns suenter sia fundaziun ha la Lia Rumantscha (LR) – sut il presidi da Johannes Flury – envidà la sonda passada a la radunanza da delegadas e delegads a Cuira. La radunanza e sa splegada a moda armonica e senza grondas discussiuns. Tant il rapport sco il quint annual 2018 èn vegnids approvads. Uschia è il project «Medias rumantschas» – ch'ha fatschentà la LR dapi la stad 2017 – vegni surdà a la Fundaziun Medias Rumantschas (FMR) cun la presidenta *Corina Casanova* ed il nov schefredactor *David Truttmann* ch'entschaiva quests dis cun sia lavur. En il center da la radunanza è plinavant stada la finiziun dal giubileum da 100 onns, festivitats ch'han custà passa 1,3 milliuns francs. Ma era la nova strategia da la LR ed ils proxims pass en il champ da la digitalisaziun èn stads temas impurtants. Il rapport d'evaluaziun ch'il Center per democrazia Aarau ha cumpilà per mauns da l'Uffizi federal da cultura davart la dumonda co che la LR impunda ses daners mussa



Il president da la LR Johannes Flury ha salvà la radunanza da delegadas e delegads a Cuira.

FOTO S. ROTHMUND

che la LR sto adattar la strategia e quai vul ella far cun focus clers per il program e las activitats dal 2020. Previs èsi da collavurar pli

fitg cun il chantun Grischun, investir dapli en la giuventetgna, integrar la diaspora grischuna e svizra, crear percepziun per la la-

vur da la LR e s'avischinar a las Rumantschas ed als Rumantschs.

> PAGINA 2

Sogns «Svizzers»?

■ (anr/abc) Ei po constar ch'ei dat mo treis sogns svizzers entochen oz. Quei han las medias rapportau dacuort en connex culla canonisaziun da Marguerite Bays. Denton: Co eis ei cun sogn Placi, sogn Otmar, sogn Glieci, valan quels buca sco Svizzers? Sogns svizzers dat ei denton ina roscha. Per exempel sogn Otmar e sogn Gagl, els ein daventai sogns cuort suenter lur mort, senza ch'in papa hagi zacu canonisau els. Il pievel ha entschiet a venerar els pervia da lur veta exemplarica. Sper sogns cun nums nunenconuschents sco Aper da Geneva, Amadeus da Losanna, Burkard da Beinwil, Tutilo, e Cunigunda da Rapperswil dat ei aunc entgins sogns pli enconuschents. Per exempel s. Verena da Solothurn, s. Francestg da Sales ni s. Pieder Canisius. Pil Grischun ein aunc treis autras persunas historicas da muntada: sogn Flurin da Ramosch, sogn Vetter da Tumeigl e sogn Gudegn da Casaccia. Oz vegnan quellas perdetgas dalla cardientscha menziunadas en guides da cultura, paucs s'interesschan denton pils fastitgs da lur veta.

> PAGINA 5

Migliurar purschida da stad

Onn da success per Penticularas Sursaisa SA e Péz Mundaun SA

DA SUSI ROTHMUND / ANR

■ Il venderdis sera han las Penticularas Péz Mundaun SA salvau la 50avla radunanza dils acziunaris ella halla plurivalenta a Sursaisa/Cuort. In di pli tard ha *Josef Brunner*, il president dil cussegl d'administraziun dallas duas societads acziunaras, era beneventau ils ac-

ziunaris dallas Penticularas Sursaisa SA el medem liug. Il venderdis ha Brunner saviu discuerer d'in'excellenta sesiun d'unviern 2018/2019 e sco el ha detg ha semplamein tut constau, nave dalla neiv sur l'aura entochen tier las frequenzas da hosps.

Quei seigi propi stau in bellezza regal sil 50avel natalezi dallas Penticularas Péz Mundaun SA.

Las Penticularas Sursaisa SA han gia tenui la 52avla radunanza d'acziunaris ed era leu ha Brunner discurriu da relaziuns da siemi ch'hagien secapescha era giu in effect sil quen annual. «Aschia stuess ei adina esser, lu fussen nus trasatras cuntents», ha el puntuau.

> PAGINA 3



Ils acziunaris dallas Penticularas Sursaisa SA e Péz Mundaun SA san selegrar d'in excellent unviern 2018/19.

MAD

COMMENTARI

Nezegiar il slontsch per ir en l'offensiva

DA MARTIN CABALZAR

La Lia Rumantscha ha festivaü suu giubileum centenar cun in vast ed interessant program ch'ha possibilitau sentupadas multifaras, promoviu l'avischinaziun e rinforzau l'identitad interna e la percepziun externa. Las festivitats centenaras a Zuoz han regurdau allas Scuntradas ed als Camps studentics dil tschientaner vargau. Quellas manifestaziuns interromantschas han dau numerus impuls en favur dil romantsch. Da quels inscuters resorta la conclusiun che la minoritad romantscha sto s'accordar ad in consens minimal. Pia buca mo trer per la medema suga, anzi, sche pusseivel era ella medema direzziun. Donn che talas sentupadas han buca liug pli savens.

Giubileums han magari la tendenza da glorificar il vargau e da sespiarder el present, tralaschond da sviluppar strategias e mesiras concretas pigl avegnir. A miu avis ha era la LR munchentau la schanza da nezegiar l'attenziun mediale en connex cul giubileum per drizzar in serius appel alla populaziun romantscha, denton cunzun era da formular claras finamiras e pretensiuns enviers la politica. In studi d'evaluaziun – fatsgs per incumbensa dalla confederaziun dil Center da democrazia ad Aarau – vegn alla conclusiun che ton confederaziun sco cantun e Lia Rumantscha fan memia pauc per mantener la quarta lingua ch'ei buca mo periclitada, anzi, smanatschada en s'existenza. Deficits ha l'expertisa constatau cunzun sil sector dalla scolaziun e formaziun, dalla promozium dalla diaspora, dalla digitalisaziun e dallas medias.

La LR sto uss urgentamein nezegiar ton quella analisa sco il slontsch dil giubileum per tschentar claras pretensiuns per in augment substanzial dil sustegn dil maun public en favur da lungatg e cultura romantscha en connex cul niev mesadi da cultura dalla confederaziun. La caschun ei aunc mai stada aschi favoreivla sco gest uss.

martin.cabalar@somedia.ch